



Stellenbosch

UNIVERSITY
IYUNIVESITHI
UNIVERSITEIT

OFFICE OF THE REGISTRAR
IOFISI YOMBHALISI OYINTLOKO
KANTOOR VAN DIE REGISTRATEUR

30 Oktober 2023

AAN : ALLE PROMOTORS (OF MEDEPROMOTORS, WAAR VAN TOEPASSINGLE) VAN
DOKTORALE KANDIDATE
(Desember 2023 – Gradeplegtighede)

c.c. : Alle Dekane, Visedekane en Adjunkregistrateurs vir inligting

Beste kollega

VERKLARING OOR DISSERTASIE BY GRADEPLEGTIGHEDE

Dit is vir my aangenaam om u geluk te wens met die prestasie van u kandidaat wat hulle doktorsgraad by een van die Desember 2023-gradeplegtighede sal ontvang. Dit is die hoogtepunt van u en u kandidaat se harde werk en ons sien uit daarna om hulle gradeplegtigheid 'n onvergeetlike ervaring te maak.

Ten einde te verseker dat die verrigtinge glad verloop wanneer die graad toegeken word, vestig ek graag u aandag op sekere stappe rakende die prosedure. Die Uitvoerende Komitee van die Senaat het die volgende riglyne opgestel met betrekking tot die verklaring wat promotors (of medepromotors waar van toepassing) oor hulle kandidaat se dissertasie by die gradeplegtighede moet doen:

- (a) Indien 'n kandidaat vir 'n doktorsgraad afwesig is by die gradeplegtigheid, word **geen verklaring** gedoen nie.
- (b) Die verklaring wat deur 'n promotor gedoen word vir 'n kandidaat wat wel teenwoordig is, moet tot 'n **maksimum van 50 woorde** beperk word.
- (c) Die verklaring is 'n **gepopulariseerde** opsomming wat tot die feitelike inhoud en belangrikheid van die navorsing en die dissertasie beperk word. (Geen biografiese inligting oor die betrokke kandidaat, die titel van die dissertasie of die aanbeveling(s) van die eksaminators moet verskaf word nie.)
- (d) Die promotor lê die verklaring voor die tyd aan die betrokke dekaan voor vir goedkeuring. (Die betrokke dekaan of fakulteitsadministrateur het u moontlik reeds hieroor ingelig.)
- (e) Die promotor gee by die gradeplegtigheid erkenning aan die voorsittende ampsdraer met 'n kopknik in die rigting van die ampsdraer (Kanselier of Visekanselier) **voordat die verklaring gelees word**. Laasgenoemde sal hierdie erkenning met 'n kopknik beantwoord.
- (f) Die aanbieding van die verklaring begin met die volgende woorde, **"Meneer die Kanselier" of "Meneer die Visekanselier"**, en daar moet by die teks wat vooraf goedgekeur is, gehou word. **U sluit met die volgende woorde af: "Ek versoek dat u die graad aan (naam) toeken.**
- (g) Nadat die verklaring gedoen is, bly die promotor by die mikrofoon staan totdat die Registrateur die graadband om die doktorsale kandidaat gehang het. (In hierdie stadium moet die volgende promotor reeds naby die mikrofoon staan om tyd te bespaar.)
- (h) **Sodra die graadband om die doktorsale kandidaat gehang is**, gee die promotor weer met 'n kopknik in hulle rigting erkenning aan die voorsittende ampsdraer, wat ook weer hierdie erkenning sal beantwoord. Slegs dan kan die promotor weer hulle sitplek inneem.

Ek vertrou dat hierdie riglyne u sal help om u taak by die toepaslike gradeplegtigheid uit te voer. Let asseblief op die belangrik inligting hieronder oor die opsomming van 50 woorde, asook die lokaal, toegangskartjies en akademiese drag.



Stellenbosch

UNIVERSITY
IYUNIVESITHI
UNIVERSITEIT

OFFICE OF THE REGISTRAR

IOFISI YOMBHALISI OYINTLOKO

KANTOOR VAN DIE REGISTRATEUR

50-woord-opsomming

Ons versoek vriendelik dat die 50-woord-opsomming by die sigblad gevoeg sal word wat die inligting van die PhD-kandidate bevat en wat deur die Fakulteitsadministrateur versprei word. Dit sal 'n baie groot hulp wees indien u nie die seremonie kan bywoon nie en sal die dekaan of aangewese plaasvervanger in staat stel om die opsomming namens u by die kandidaat se plegtigheid voor te lees.

Lokaal

Die gradeplegtighede word van Maandag tot Vrydag, 11 tot 15 Desember 2023 in die Coetzenburg-sentrum, geleë op die Coetzenburg-sportterrein, gehou. Die sentrum is nou weer in gebruik nadat dit vroeër vanjaar gedurende die Maart-gradeplegtighede weens instandhoudingswerk nie gebruik kon word nie.

Toegangskaartjies

Let asseblief daarop dat lede van die akademiese prosessie **nie** toegangs- en parkeerkaartjies sal ontvang nie. In plaas daarvan sal alle prosessieledes in Coetzenburg-sentrum se parkeerterrein parkeer. Ons toegewyde sekuriteitspan sal die lys van prosessieledes byderhand hê. Hulle sal toesien dat die toegangsproses vir alle betrokke partye glad verloop. Klik asseblief [hier](#) om die parkeerkaart te sien.

Akademiese drag

Akademiese drag sal in die voorportaal van die Coetzenburg-sentrum beskikbaar wees vir personelelede wat aan die akademiese prosessie deelneem en nie oor hulle eie akademiese drag beskik nie. Let asseblief daarop dat hierdie togas onmiddellik na afloop van die gradeplegtigheid in die voorportaal terugbesorg moet word. U is ook welkom om u eie akademiese drag te dra.

Aankomstyd

Persone wat aangedui het dat hulle aan die prosessie gaan deelneem, word versoek om **45 minute voor die aanvang van die plegtigheid** by die prosessiekamer in die Coetzenburg-sentrum vir die opstel van die prosessie aan te meld.

Vriendelike groete

Dr Ronel
Retief
Registrater



Stellenbosch

UNIVERSITY
IYUNIVESITHI
UNIVERSITEIT

OFFICE OF THE REGISTRAR

IOFISI YOMBHALISI OYINTLOKO

KANTOOR VAN DIE REGISTRATEUR